

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na \_\_\_sjednici Predstavničkog doma, održanoj\_\_\_\_\_ 2007. godine, i na \_\_\_sjednici Doma naroda, održanoj \_\_\_\_\_ 2007. godine, usvojila je

**ZAKON**  
**O IZMJENAMA I DOPUNAMA ZAKONA O OSNOVAMA SIGURNOSTI**  
**SAOBRAĆAJA NA PUTEVIMA U BOSNI I HERCEGOVINI**

**Član 1.**

(1) Član 178. stav (1) Zakona o osnovama sigurnosti saobraćaja na putevima u Bosni i Hercegovini ( „Sl. glasnik BiH“, br. 6/06, 75/06 i 44/07) mijenja se i glasi:

„ Osposobljavanje kandidata iz oblasti propisa o sigurnosti saobraćaja može obavljati licencirano lice koje ima najmanje višu stručnu spremu saobraćajnog, pravnog ili nastavno- pedagoškog smjera“.

(2) U članu 178. Zakona iza stava (2) dodaje se stav (3) koji glasi:

„ Izuzetno od uslova utvrđenih stavovima (1) i (2) ovog člana, osposobljavanje kandidata iz oblasti propisa o sigurnosti saobraćaja u periodu ne dužem od četiri godine od stupanja na snagu ovog zakona mogu obavljati i lica koja imaju najmanje pet godina radnog iskustva na ovim poslovima, stalni radni odnos u autoškoli i srednju stručnu spremu (IV. stepen)“.

U članu 178. dosadašnji stav (3) postaje stav (4), stav (4) postaje stav (5), stav (5) postaje stav (6), stav (6) postaje stav (7).

**Član 2.**

Ovaj zakon stupa na snagu osmog dana od objavljivanja u «Službenom glasniku BiH».

PSBiH, broj \_\_\_\_\_/07  
\_\_\_\_\_ 2007. godine  
Sarajevo

Predsjedavajući  
Predstavničkog doma  
Parlamentarne skupštine BiH

Milorad Živković

Predsjedavajući  
Doma naroda  
Parlamentarne skupštine BiH

Ilija Filipović

## **O B R A Z L O Ž E N J E**

### **I . USTAVNI OSNOV**

Ustavni osnov za donošenje ovoga zakona sadržan je u članu I/4 i članu III/1. h) i i) Ustava BiH, kojima je utvrđeno:

- puna sloboda kretanja lica, robe, usluga i kapitala kroz Bosnu i Hercegovinu,
  - da je u nadležnosti institucija Bosne i Hercegovine uspostavljanje i funkcioniranje zajedničkih i međunarodnih komunikacija, kao i reguliranje međuentitetskog saobraćaja.
- Konačno, riječ je o izmjenama i dopunama Zakona koji je Parlamentarna skupština BiH donijela i za koji je već utvrđeno da ima ustavni osnov.

### **II . RAZLOZI ZA DONOŠENJE ZAKONA / OBRAZLOŽENJE POJEDINIHRJEŠENJA**

Komisiji za saobraćaj i komunikacije Predstavničkog doma obratili su se Savez kantonalnih udruženja vozača - instruktora vožnje i autoškola Federacije BiH i Udruženje autoškola Republike Srpske sa inicijativom da se izmijeni i dopuni član 178. Zakona o osnovama sigurnosti saobraćaja na putevima u BiH ("Sl. glasnik BiH", br. 6/06, 75/06 i 44/07).

U inicijativi je istaknuto da je neophodno promijeniti nivo stručne spreme za predavača iz oblasti propisa sigurnosti saobraćaja, jer će primjena člana 178. Zakona i Pravilnika o uslovima i načinu dobivanja licence ("Sl. glasnik BiH", br. 12/07 i 41/07) dovesti do zastoja u procesu osposobljavanja kandidata za vozače motornih vozila, te ugroziti poslovanje autoškola. Mišljenja su da vozačima instruktorima treba dati mogućnost da se doškoluju, odnosno stručno osposobe, pa predlažu da u prijelaznom periodu poslove predavača mogu obavljati i vozači instruktori sa srednjom stručnom spremom, koji imaju najmanje pet godina radnog iskustava na ovim poslovima.

Član 1. stav 1. - članom 178. stav 1. Zakona propisano je da osposobljavanje kandidata iz oblasti propisa o sigurnosti saobraćaja može obavljati licencirano lice s visokom spremom saobraćajnog smjera. Smatramo da ove poslove mogu kvalitetno obavljati i lica sa višom spremom, što je već slučaj u zemljama regije.

Član 1. stav. 2 - Komisija cijeni da je opravdano za lica sa srednjom stručnom spremom, koja imaju dugogodišnje iskustvo na poslovima osposobljavanja iz oblasti propisa o sigurnosti saobraćaja i stalni radni odnos u autoškoli, dati razuman vremenski rok (četiri godine) koji će im omogućiti da steknu odgovarajuću stručnu spremu.

### **III . PRINCIPI NA KOJIMA JE ZAKON ZASNOVAN**

Prijedlog zakona ne odstupa od principa na kojima je zasnovan osnovni tekst.

#### **IV. FINANSIJSKA SREDSTVA**

Za primjenu ovoga zakona nije potrebno izdvojiti dodatna finansijska sredstva .

Sarajevo, 11.10.2007. godine